

乾隆杭州府志

杭州府志卷九十三

人物八 文苑一

漢

三國吳

丁諲錢唐人時尚門閥而詔地族寒微與陽羨張秉烏程吳粲雲陽殷禮並有時名顧邵博覽書傳好樂人倫拔而友之爲立聲譽揚其善以並陸全之列

咸淳志

晉

褚陶字季推錢唐人弱不好弄清閒淡默以墳典自娛年十三作鷗鳥水碓二賦見者奇之陶嘗謂所親曰聖賢備

在黃卷中捨此何求州郡辟不就吳平召補尚書郎張華見之謂陸機曰君兄弟雲躍龍津顧彥先鳳鳴朝陽謂東南之寶已盡不意復見褚生機曰公但未覩不鳴不躍者耳華曰故知延門之德不孤川嶽之寶不匱矣遷九真太

守轉中尉

晉書本傳

按舊志載干寶晉書本傳寶新蔡人一統志寶白新蔡徙嘉興父瑩墓海鹽故省志列之嘉興卷中而舊志以爲南遷徙居臨安者乃臆說也今刪

南北朝

范悅錢唐人善詩宋文帝云天下有五絕而皆出錢唐謂

杜道鞠彈碁范悅詩褚欣遠模書褚允圍碁徐道度療疾

也

南史張融傳

朱廣之字處深錢唐人善清言初顧歡著三名論以正四本之失尚書劉澄臨川王常侍朱廣之並立論難與之往復而廣之才理尤精詣

咸淳志

朱异字彥和吳郡錢唐人年數歲外祖顧歡撫之謂异祖昭之曰此兒非常器既長折節從師遍治五經尤明禮易涉獵文史兼通雜藝博奕書算皆其所長年二十詣都尚書令沈約面試之因戲曰卿年少何乃不廉异未達其旨約乃曰天下文義碁書卿一時將去可謂不廉也尋以明

山賓表薦高祖召見使說孝經周易義甚悅之謂左右曰
朱异實異召直西省俄兼太學博士累遷散騎常侍自周
捨卒後代掌機謀朝儀國典詔誥勅書並兼掌之每四方
表疏當局簿領填委于前异屬辭落紙覽事下議縱橫敏
贍不暫停筆頃刻之間諸事便了所撰禮易講疏及儀注

文集百餘篇

梁書本傳

唐

孫過庭字虔禮富陽人右衛胄曹參軍博雅有文章草書
憲章二王工于用筆嘗著書論妙盡其趣卽書譜也

述書賦注

按張懷瓘書斷孫虔禮字過庭陳留人官至率府錄事

參軍今從書畫譜引述書賦注

又按舊府志有顧况傳萬歷志稱况鹽官人全唐詩話作蘇州海鹽人攷鹽官之境甚廣仁和海寧海鹽皆其所分詳見建置卷中顧况所居實在今嘉興所屬海鹽有橫山讀書臺可證也舊志不攷疆域分合之原誤以其居舊屬鹽官遂入杭郡今刪

凌準字宗一新城人少以孝弟聞于其鄉常著後漢春秋二十餘萬言又著六經解圖及文集爲人有謀略尚氣節年二十以書干丞相以聞試其文日萬言擢爲崇文館校書郎累遷殿中侍御史浙東廉使判官能撫循罷民按驗

汴吏入爲翰林學士遂爲尚書仍以文章侍從以連累出

知和州降連州以沒

浙江通志

按富陽志準又作富春人

章孝標錢塘人

咸淳志

元和十三年下第時輩多爲詩以刺

主司獨孝標爲歸燕詩上考官庾承宣與知舉侍郎鄭愚

承宣得詩展轉吟諷及重典禮曹孝標來年登第除秘書

省正字

錢塘詩話

太和中辟山南東道從事試大理評事有集

一卷

錢塘縣志

子碣登乾符進士亦能詩唐時錢唐以詩名者

孝標父子

舊志

按唐登科記章孝標錢塘人中元和十四年韋湛榜咸

淳志亦稱爲錢塘人而桐廬志稱孝標爲邑之常樂鄉
八元子全唐詩傳云桐廬人家錢塘其說爲近之桐廬
志又稱五代時錢武肅以桐廬隸杭州則附會之說也
錢氏以桐廬隸杭州豈卽以桐廬爲錢塘乎全唐詩話
又稱前有八元後有孝標皆桐廬人同姓而皆不達以
八元孝標爲同姓又非父子矣姑存以俟考

孫彊富春人因顧野王玉篇增字三十卷爲大廣益會玉

篇大概本說文云

萬歷舊志

袁不約字還朴新城人登長慶三年進士又試平判入等
仕至職方員外郎有集一卷羅隱撰新城築城記有云天

下無事吾鄉則有凌準吳降袁不約以文章進

十國春秋

五代

羅隱字昭諫新登人初名橫貌寢陋凡十上不中第遂更
今名能詩與族人虬鄴齊稱謂之三羅謁武肅王以所爲
夏口詩標卷首中有一箇禍衡容不得思量黃祖謾英雄
王覽詩大笑加殊遇王初授鎮海節度使令沈崧草謝表
盛言浙西繁富隱曰今浙西兵火之餘日不暇給此表入
奏執政豈無意要求耶迺請更其略曰天寒而麋鹿常遊
日暮而牛羊不下朝廷見之曰必羅隱辭也王待隱日隆
一日常寢疾王親臨撫問因題詩于壁隱爲續末二二句

幕紅紗于上以志恩遇累官鹽鐵發運使著作佐郎司勳

郎中遷諫議大夫給事中卒年七十七

十國春秋

按新登卽新城梁時所改而資治通鑑唐詩品彙皆稱

爲餘杭人舊五代史作錢塘人今攷墓在新城縣界徐

村水塢是爲新城人宜矣舊志卒年七十七誤作八十

餘今從十國春秋改正

羅鄴餘杭人咸通中舉進士不第與宗人隱虬齊名時稱

三羅鄴歿後光化中韋莊奏追賜進士及第贈官

全唐詩小傳

林克已錢塘人吳越忠懿王時官通儒院學士博學善文

章宋隱士逋卽其孫也

十國春秋

宋

錢昆字裕之侂子隨俶歸朝諸從子皆授官獨昆與其弟易願從科舉遂登進士第累遷至三司度支判官仁宗時知廬濠泉亳梓壽許七州爲治尚寬簡官至右諫議大夫以秘書監致仕卒年七十六昆善爲詩賦又善草隸有文

集十卷

咸淳志

錢易字希白昆弟年十七舉進士御試三題日中而就言者以其輕俊而黜之太宗語蘇易簡曰朕恨不與李白同時易簡曰有錢易者李白才也上欲用唐故事召至禁林不果咸平二年再舉進士甲科爲光祿寺丞通判蘄州上

疏乞除非法之刑景德二年舉賢良方正科策入等除秘書丞通判信州真宗封泰山獻殊祥錄遷太常博士直集賢院祀汾陰修車駕所過圖經轉祠部員外郎幸亳州復修所過圖經擢知制誥天聖三年遷翰林學士時惟演以鈞衡之命乃易當制世稱弟拜相兄草麻傳以爲榮徠直未滿而卒易俊逸過人爲文數千百言頃刻而就爲歌詩有義山長吉體又善行草書世有絳帖潭帖臨江帖三帖惟潭帖爲勝以希白所臨本也子二長彥遠次明逸

咸淳志

錢昱字就之吳越忠獻王佐長子秀州刺史從俶入朝授白州刺史改秘書監嘗以鍾王墨迹八卷爲獻有詔褒美

至道中爲郢州團練使善筆札工尺牘

宋史異
越世家

唐詢字彥猷錢塘人父肅字叔元咸平初進士仕至龍圖閣待制天聖中詔許天下獻所爲文章時應詔者百餘人有司第其善者詢等數人而已召試賜進士及第爲御史除尚書工部員外郎直史館英宗卽位爲三班院判太常院兼禮儀事治平元年卒贈禮部侍郎詢筆迹道媚得歐陽率更數行精思學之遂以書名天下非精紙佳筆不妄

書也

咸淳
志

元積中字子發絳從子景祐開知台州黃巖縣治平中守山陽樂士喜談笑山陽介東南舟車之衝客至殆不容館

穀熙寧初爲司封郎中直史館知桂州軍有江湖堂詩集

宋詩
紀事

強至字幾聖杭州吳山里人少有志節力學問至忘寒暑
鄉試爲舉首賦出四方皆傳誦之慶歷六年登進士第素
受知于韓琦琦鎮相魏常引至自助琦爲詩合賓客屬和
至獨思致逸發不可追躡琦上奏及他書記皆至屬稿琦
乞不散青苗神宗閱其奏曰此必強至之文也琦數薦至
充館閣未及用而卒官至祠部員外郎

萬歷
舊志

沈遼字睿達錢塘人幼挺拔不羣長而好學尚友傲睨一
世讀左氏班固書小摹倣之輒近似乃鋤植種拾自成一

家趣操高爽飄飄然有物外意熙寧初爲西院主簿故受
知于王安石至當國更張法令遼與之議論寢拂意日益
見疎于是罷去久之監杭州軍資庫攝華亭縣他使者適
有所憾文致其罪下獄流永州徙池州既至池得九華秋
浦玩其林泉卽築室于齊山之上名曰雲巢悉謝棄少習
杜門隱几間作爲文雄奇峭麗尤長于歌詩蘇軾曾鞏黃
庭堅皆與唱酬

宋史本傳

按宋史本傳遊監杭州軍資庫攝華亭縣咸淳志則云
爲吳縣令兩說不同今從正史

周邠字開祖錢塘人嘉祐八年登進士第熙寧間蘇軾倅

杭多與酬倡所謂周長官者是也後賦知湖州以詩得罪

邠亦坐贖金元祐初邠知管城縣通判壽春府知吉州官

至朝請大夫上輕車都尉其邱墓在南蕩山

咸淳志

邠係元

符末上書人至崇寧初第爲上書邪等政和元年又爲僧

懷顯序錢唐勝蹟記蓋歷五朝云

遼寧律髓

周邦彥字美成邠姪少涉獵書史遊太學有僑聲元豐中

獻汴都賦七千言多古文奇字神宗嗟異命左丞李清臣

讀于邇英閣多以偏旁言之不盡悉也由諸生擢太學正

徽宗卽位爲校書郎累遷知隆德府徙明州以秘書召賜

對崇政殿上問汴都賦對以歲月久不能省憶用表進入

帝覽表稱善除徽猷閣待制提舉大晟府知真定府改順

昌府提舉洞霄宮卒年八十

咸淳志

邦彥能文章妙解音律

樂府播傳風流自命顧曲名堂不能自己貴人學士市儂
妓女皆知美成詞爲可愛至于詩歌自經史中流出當時
以詩名家如晁張皆自歎以爲不及其文識者謂有工力
深到處聲鏡鳥凡之銘有鄭圃漆園之風禱神之文倣送
窮乞巧之作又工書真行皆善晚居明州自號清真居士

有集二十四卷

書史會要

按汴都賦七千言宋史本傳作萬餘言徽宗問汴都賦
史作哲宗恐係宋史之訛今載咸淳志以備參考

薛尚功字用敏錢塘人紹興中爲通直郎官至僉書定江

軍節度判官廳事善古篆尤好鐘鼎書書史會要尚功鐘鼎彝

器欵識二十卷鐘鼎篆韻七卷文獻通考

趙鞏字子固錢塘人乾道八年進士嘗奉使金金主問皇

帝清問下民賦非所作乎歎服其文學從遊者衆號西林

先生慶元禁僞學鞏以秘閣修撰知揚州入黨籍云咸淳志

張鑑字功父居錢塘清標雅致爲時聞人詩酒之餘能畫

竹石古木著有桂隱百課捨所居爲梵刹命曰桂隱堂館

橋池諸名各賦詩凡數百篇武林舊事

吳禮之字子和號順受老人錢塘人工詞著名有詞五卷

鄭國輔嘗稱其雨中花慢及醜奴兒皆能以尋常語言爲

極透脫文字

詞綜小傳

楊均咸淳間人工文詞令吳由修海昌圖經均實秉筆書成十卷又爲著先賢錄以表彰邑先輩之名蹟雙廟侑祭

樂章亦均所作也

寧志備攷

張雯字子昭其先浚儀人南渡居錢塘力學嗜書所居臨市衢尤精律呂每衆坐聞樂輒俯首頓感曰吾其不免乎子田字耘已亦工文詞田子肯字繼孟一字寄夢從金華宋濂學所爲詩文清麗有法尤長于南詞新聲

萬歷錢塘縣志

錢明逸字子飛錢塘人舉才識兼茂科父子三人皆中制

科世以爲盛累官翰林學士贈禮部尚書謚修懿

錢塘縣志

元

仇遠字仁近一字仁父錢塘人宋咸淳中以詩名與白珽並稱于吳下人謂之仇白若唐之皮陸也一時遊其門者若張雨張翥莫維賢皆有名當時宋亡落魄江湖間元至元中部使者強以學職起之爲溧陽州學教授以杭州知事致仕自號近村又號山村學者稱山村先生洪武初祀鄉賢祠

舊錢塘縣志

遠留情雅道滌筆冰澌其詩近體主唐古

體主選晚年謝事樂于湖山泉石間多與方士遊名山勝地佛刹靈區足跡所到輒有題咏又工書釋宏道贈詩云

吾愛山村友詩工字亦工波瀾唐句法瀟灑晉賢風僧守
道亦贈詩云朝野尊遺老山村有逸民書傳東晉法詩接

晚唐人似爲山村寫照也

山村
遺集

白珽字廷玉錢塘人父嶸官通武郎珽本四明名儒舒少
度遺腹子嶸育以爲嗣習爲科舉業有聲場屋開元伯顏
平江南檄爲安豐丞辭不赴乃授書北關數里外藏書之
家晝緡夜誦燈墜花穴帽不知也後授太平路儒學正攝
行教授事修建天門采石二書院再遷婺州路蘭谿州判
官謝事養病結廬西湖金沙灘有泉自天竺來及門而漚
榜之曰湛淵因以白號天歷元年卒塋棲霞山之陽珽性

至孝母病刲股和藥父感奇疾醫言必得兔屎可療蹈水
雪緣崖穴求之三日不得父死抱屍哭絕而復蘇長于詩
文紫陽方回稱其冠絕古今有英雄大夫文氣廬陵劉辰
翁又言其不爲雕刻苛碎有雲山韶濩之音皆確論也

撰墓誌

葉森字景修錢塘人早從貞白先生吾子行游古文詩歌

咸有法度

萬歷舊志

廬浩錢塘人好古博學其爲詩如不經心天然超詣流輩

罕及

萬歷舊志

馮士頤富陽人贈集賢修撰驥子也儻有大志能文章

作詩風格清峻與吳見心黃子久並負才名

舊志

凌緯字景文昌化人號菊山篤學能文大德中以才薦爲雪江書院山長尋棄去年九十三卒邑令表之曰康德先

生

昌化縣志

楊葵字彥常

一云子常

錢塘人登進士第官至翰林學士以詩

古文見重于臺閣工篆隸真楷張雨素負詞翰名然自以爲不及四明李仕開饒子貴葵與會稽胡舜咨金華戴叔能曹南吳主一豫章揭伯防先後遊四明仕開招致賓客

俾諸子問業焉

成化舊志

按元時有楊葵字彥常錢塘人明初有楊葵字宗葵餘

姚人書畫題跋有楊葵題錢逸山居圖詩云好山誰寫
北苑畫斷橋我憶西湖居詳其語意乃錢塘楊葵也朱
葵尊明詩綜屬之餘姚楊葵似誤

吳睿字孟思杭州人少好學工翰墨尤精篆隸凡歷代古
文款識制度無不考究得其要妙下筆初若不經意而動
合矩度識者謂吾邱衍趙孟頫不能過也自號雪濤散人

武林
舊事

楊載字仲宏其先居福建浦城後徙杭因爲杭人少孤博
涉羣書爲文有跌宕氣以布衣召爲國史院編修官延祐
初以科目取士載首應詔登進士授承務郎遷儒林郎寧

國路總管府推官初吳興趙孟頫在翰林得載所爲文極推重之由是名動京師凡所撰述人多傳誦之

元史本傳

王應午昌化人以文學薦爲學錄其可見者紫微道院碑

惜其遺文弗傳

昌化縣志

盛明叟昌化南峽川人以文學名築蒙齋讀書因以自號工文詞所著有凍蠅說雪賦蕨薇子傳爲士大夫所稱仕

終儒林郎甌寧縣丞

昌化縣志

陳正已昌化人讀書博洽法興院碑文是其所撰

昌化縣志

葉正字仲貞錢塘人爲學不事章句喜以詩自鳴貫酸齋甚器重之年三十不娶父爲釣臺書院山長同往桐廬居

焉父死貧不能歸日賣藥市中以自給風神瀟爽不能隨
世浮沉與同邑人李驥龍善禎死驥龍爲具棺買地塋焉

桐廬
縣志

皇甫陳錢塘人忠義之氣遇事觸物沛然發見非雕鐫刻

畫有意爲文者比

元詩選
小傳

屠約字存博號月汀杭人與白珙仇遠相結爲詩友初爲
溧水訓導後陞徽州教授沒于官詩文多不傳其卒也馬
臻弔之詩有云留得乾坤清氣在逸墳梅樹乞吟詩

武林
耆舊

集

葉廣居字居仲

一作
居仁

錢塘人祖文康積學從政正色立朝

述禮經會元以明周公建邦立極敦禮崇樂之要廣居承
其家學于書無所不讀其所長者春秋與錢惟善習道原
楊維禎皆以是經名重浙水東西廣居天資超邁才力絕
人爲古文詩詞下筆若有神助化至浙江儒學提舉築室
西泠橋陶情詩酒

魏驥自得齋
詩文集序

莫維賢字景行錢塘人好學能詩雅尚標致築別業于靈
隱天竺間遶屋栽杏號曰杏園日與騷人墨客遊咏其中
列二十一題時人比之輞川

萬歷
舊志

按舊志作莫繼賢謨

梁建中錢塘人早嗜伊洛之學復有志于文辭下筆滔滔

數百言皆典雅溫厚絕不以聲牙佶倔爲奇一時士大夫皆稱譽之門人宋濂序其文集謂刻苦好學老而不倦以比漢之袁公業云

錢塘舊志

吳復字見心號雲槎富陽人少落拓不羈中年折節讀書晚遊湖海間見閻益博善樂府歌詩受業楊維禎與山陰

張憲齊名維禎沒爲輯其文集

富陽縣志

邾經字仲誼杭州人性曠達元進士務博覽強記以涵蓄其胸中發爲歌詩緣情指事引物連類有風人之體裁滄海遺珠以其詩壓卷蓋明初嘗徙滇也

徐一夔玩齋稿敘

明

凌雲翰字彥紳仁和人博通經史工詞章領至正十九年鄉薦除學正不起作梅詞霜天曉角一百首柳詞柳梢青一百首號梅柳爭春詞調俱美洪武初舉杭州府學訓導

陞成都府教授所著有柘軒集

浙江通志

錢惟善字思復錢塘人至元元年省試羅利江賦時鎖院三千人獨惟善据枚乘七發辨錢塘爲曲江由是得名號

曲江居士官副提舉張士誠據吳遂不仕

明史楊維禎傳

瞿佑字宗吉錢塘人學博才贍風致俊朗少不爲父所知佑年十四鄉人張彥復指雞爲題命賦之佑應聲成詩彥復大加稱賞手寫桂花一枝并題其上以贈父遂構傳桂

堂一日揚維楨訪之出所作香奩八咏示佑佑悉和之維楨歎曰瞿家千里駒也凌雲翰作梅柳爭春佑一日盡和之雲翰亦驚嘆嘗築一舍自署西泠草堂洪武中以薦累遷周府右長史永樂間以詩禍編管保安洪熙乙巳釋歸復原職內閣辦事年八十七卒

堯山堂外紀

王洪字希範錢塘人八歲能文從胡粹中授春秋洪武十三年進士除行人遷吏科給事中改翰林院檢討會修永樂大典充副總裁官歷修撰侍講尋左遷禮部主事尚書呂震奉命巡行陝西部務多決于洪帝奇其才詔作佛曲序洪難之爲同官所擠不進用得疾卒洪敏于才在翰林

時凡有歌頌以命洪輒立就與解縉王偁王璉王達號東
南五才子偁最自負獨推重洪不敢與齒

曝書
亭集

陳世昌字彥博以字行號西湖真拙錢塘人力學攻古文
元至正初由布衣入爲翰林編修代祀海上值道梗遂留
嘉興授徒養母張士誠據平江屢致不屈明洪武初徵修
禮書授太常博士尋以母死辭後復徵至京而卒所著有

希言

一作
希賢集
嘉興
府志

俞友仁字文輔錢塘人洪武初設科發解浙省第一任襄
陽教諭工詩博通經史善草隸書更工于楷歷司文衡與
修會典教育人才多有成就後調諸城學卒于官

舊錢塘
縣志

劉儼字敬思錢塘人元末隱居西湖明初徵入修禮樂書授廣東市舶司令有樗隱集儼爲松江管訥之師其卒也

訥哭以詩丁鶴年極稱之

靜志居詩話

王恪字敬仲錢塘人進士洪武中知臨江府興學育才尤

工詩翰時以文章太守稱之

臨江府志

張輿字行中仁和槎溪人洪武初上書論時務稱旨授刑部主事弟輅字行素永樂九年舉人並擅詩文詞翰清麗

成化舊志

桂衡字孟平仁和人

萬歷舊志

博學能文每一篇出人競傳寫

刻意于詩日課不輟體製秀整意思春容又喜爲小詞令

瞿佑亟稱之

靜志居詩話

白范一作范字以中號西塘錢塘人才敏學瞻詩格清奇仕

至黃州府同知

成化舊志

平顯字仲微仁和人博學多聞風流醞藉詩文皆有典則書法深穩可尚洪武間應孝弟力田爲廣西藤縣令降主簿尋謫戍雲南顯溯長江經洞庭道夜郎其爲歌詩怪變豪放得遠遊之助西平侯沐英請于朝除伍籍爲塾賓

兩浙

名賢錄

周昉字元亮號草亭仁和人讀書樂道以古人自期詩文

典雅作小楷得晉人筆意所述有西嶗稿

萬歷舊志

馬洪字浩瀾錢塘人幼好咏詩凡唐人絕律日不釋手以
辭賦擅名東南清修苦節授徒以給養親之費所交皆一
時名士每過從出遊衣冠雜策車從都雅洪獨葛巾草履
高步其間望之若野鶴之在雞羣詩有大歷風致詞調尤

極妍麗

錢塘縣志

按馬洪亦作仁和人

高得暘字孟升號節菴錢塘人處士一元之子洪武間以
文學薦授臨安縣學教諭陞高州府學教授永樂初召爲
宗人府經歷纂修大典爲副總裁進講春官博學洽聞詩

文純雅名重一時

舊錢塘縣志

胡奎字虛白海寧人寧王府教授博綜羣籍尤長于五七言嘗泊舟鄱陽湖望湖亭見石刻東坡墨雲堆雨未遶山絕句次韻和之書之于壁俄見一叟來誦其詩曰子非斗南老人耶乃爲長揖回顧不知所之因以斗南老人自號高啓贈以詩所云簌弄明月琵琶洲者是已官寧府七年疾篤作葵頌以進寧王序其集行世

兩浙名賢錄

朱祚字永年晚號默齋海寧人洪武中有神童之目起家楷書科試事詹事府歷永樂洪熙宣德三朝皆以詞賦被賞累官翰林修撰尚寶少卿子禮博極羣書被薦官中書

舍人

寧志備攷

陳贇字維成本餘姚人後徙居錢塘父性善官北京行在
選曹郎中贇從鄉先生宋公傳張天民學得其詩法古體
通陶柳迎體駸駸乎盛唐以薦授杭州府學訓導擢翰林
待詔纂修宣宗實錄稱有史才陞五經博士出爲廣東叅
議命教內豎遷太常少卿致仕贇不激不亢冲和坦夷人
咸親之愛錢塘山水之勝構別業于武林城北十里因卜
居焉及卒門人私謚曰文康先生

萬歷
舊志

李暉字子華餘杭人洪武二十二年除中書舍人陞廣東
按察司僉事永樂間編修唐史除福建左叅議兼修永樂

大典改除江西左叅議卒

餘杭
縣志

李暉字宗表錢塘人結草閣居北關門外後避兵金華卜築永康洪武初國子助教得詩法于李季和歌行一氣孤行獨開生面正如淮陰之師多多益善囊沙拔幟辟易萬人于轅字公載官瓊州宜倫縣丞

靜志居詩話

按明初有三李暉其二皆杭人其一山東兗州人亦能詩見山東通志

張侗字愿中仁和人永樂二年進士授工科給事中以不長封駁改永寧判官素優文學徵修永樂大典書成改中書舍人擢左春坊中允歷官太僕寺少卿

舊志

朱瑛字文彩新城人永樂十三年進士性警悟過目成誦

士夫過其家取架上書問之無不通能詩文超軼絕羣尤

精于經學

萬歷舊志

蘇平字秉衡號雪溪海昌人弟正字秉貞號雲壑弟直字

秉忠皆以詩文著

寧志備考

三荆同珠無分高下名在吳下十

才子之列

靜志居詩話

木訥字近仁錢塘人永樂辛卯解元戊戌進士官至河南

道御史以文學名墓在清波門外湖濱瞿佑歸田詩話及

天目山獅子正宗禪碑皆訥所撰

成化舊志

孫子良錢塘人永樂進士選庶吉士與修大典拜武選郎

成祖北狩尚書方賓從行子良以郎曹攝部事鈐制屬吏

同列不能平羣口交詬謫交趾布政司使交趾素不喜學
子良善道誘之漸濡德教多有成者洪熙初薦起仕至叅

政少善詩學所著有螺成集

錢塘縣志

胡廸字彥吉世籍錢塘太平里早涉獵書史與弟彥德事
父母盡孝屬元季兵燹徙居東城橫塘里娶沈氏名妙善

亦知書

成化舊志

董鏞字孟聲仁和人永樂初進士入翰林授文學官久之
薦知永豐縣有學行詩文平和類其爲人文集凡三卷

成化

舊志

周禮字德恭別號靖軒餘杭人生而穎異十歲能詩文弱

冠補弟子員博極羣書淹貫經史因累科不第隱居護國山以著述爲業學者傳之稱靖軒先生

國朝入祀鄉賢祠

餘杭縣志

潘俊字仲傑昌化人性質訥不事華飾年四十膺永樂癸卯鄉薦赴春官不第充正心堂直班一日朝廷臨視大學召對稱旨擢監察御史裏行尋得病歸卒年五十一俊篤志爲學精心研理遇疑義輒廢寢食有所得則欣然著述

藏于家

昌化縣志

徐珙字聯璧錢塘人宣德丁未與弟璟同舉進士時號聯璧因以爲字晚守湖南寶慶府值部使者有隙誣罪除名

安置塞外天順初起用卒于京詩文多散失嘗有題畫詩
云秋色荒涼景物殘池荷半老水生寒鶴鴿好似人兄弟
不暫分飛赴急難璟官主事亦能詩琪子伯齡字延之號

籀冠道人博學強記洞曉音律尤工樂府

七修類稿

王獻字惟臣號退菴仁和人童時日誦數千言過目不忘
年十七領鄉書登景泰辛未進士授編修與修寰宇通志
成陞修撰癸未同考會試壬辰陞翰林院學士修續元通
鑑綱目成陞少詹事兼學士戊戌預修文華大訓成陞太
常寺卿仍兼侍讀學士獻美風神善詞令天才逸邁文思
警穎作字飄逸類其爲人贈禮部右侍郎謚褒敏

萬歷舊志

陸昂字元俛號清溪錢塘人博雅嗜吟咏少遊劉菊莊之門同列率罕及之

舊志

陸廷玉字用圭號履齋仁和人其先本馬姓贅于陸氏承其姓宏治中以歲貢爲光澤教諭善古文能詩立意遣詞

包涵高古與沈宜善迭爲倡和多膾炙人口

武林耆舊集

張錫字天錫錢塘人號海觀別號笑菴居士天才拔萃文雄一時落魄不羈縱情詩酒領天順壬午鄉薦授山西山陰縣教諭解官南還湖山燕集殆無虛日人以鐵厓方之所居燬于火自作短疏知交助其落成所構有望海亭見

山樓育魚軒

堯山堂外紀

賀榮字師桓錢塘人也世以醫名至榮博綜經史百家言
喜論當世之務媿媿可聽詩文古澹有理趣家藏古書畫
彝器之屬善鑒賞

成化舊志

吳瓚字器之仁和人宏治庚戌進士授戈陽令調永新知
南通州兩月乞休性好吟咏多撰述考求遺聞卒年九十

餘

萬歷舊志

張傑字子輿仁和人正德庚午舉人家貧義不苟取喜作
詩多不構思得意卽賦往往有奇拔句士多傳誦時人稱
之曰張子輿清新俊逸老杜見之當爲拭目平生尚氣節

不肯媚人官南陵教諭卒

仁和縣志

張文宿字拱辰仁和人賦性奇偉獵秦漢盛唐諸名家攻
古文詞詩賦籠罩靡前正德癸酉薦于鄉屢試南宮不第
釋褐晉江令遭讒落職就西湖傍築一小樓湖中置一舫
與郡中沈青門方十洲輩結爲詩社其詞華沈著不爲浮
綺爲時所宗弟文輝字仲初文燿字維昇西湖名勝並有

題詠

武林者
舊傳

田汝成字叔禾錢塘人嘉靖進士授南刑部主事改禮部
遷郎中廣東僉事謫知滁州擢貴州僉事改廣西右叅議
龍州祥州土酋皆弑主自立與副使翁萬達密討誅之努
灘賊爲亂汝成復設策誘禽又達善後七事遷福建提學

副使歲大比預定諸生甲乙榜發如所定汝成博學工古
文尤善敘述歷官西南諳曉先朝遺事撰炎徼紀聞歸田
後盤桓湖山窮浙西諸名勝撰西湖游覽志子藝衡字子
莸十歲從父過采石賦詩有警句性放誕不羈嗜酒任俠
以歲貢生爲徽州訓導罷歸作詩有才調爲人所稱

明史
文苑

傳

蔣灼字子九餘杭諸生工詩隱居安貧自得以吟咏爲娛
與田汝成倡和詩甚多田集中往往附載之論者比之薛
能盧綸之流亞也

餘杭
縣志

茅瓚字邦獻錢塘人少時夢神人授一巨字文曰見滄因

以爲號後讀書寶奎寺山巔始至夜雷雨大作質明露見
滄二大字蓋故鏡宋理宗御書適與夢符嘉靖戊戌進士
第一歷南北祭酒禮部侍郎兼學士加太子賓客以吏部

左侍郎引歸

錢塘縣志

沈友儒號南泉海寧人嘉靖戊戌進士官刑部員外與治
西宮之獄外轉揚州同知博習羣書嗜酒放誕雖僻祠廢
院碑記尋覽殆遍文集散佚人間

舊志

邵琇字佩之富陽人博綜載籍嘗與錢塘田汝成輩爲文
社有聲入南監師事湛若水嘉靖辛丑授四川崇慶州判
官謫歸琇在蜀多託吟咏爲諸公所稱至以佳句相呼如

張三影云年九十四卒

富陽縣志

李奎字伯文號珠山錢塘人起家刀筆由布政司吏再考從事錦衣善詩跌宕自豪從秦人謝榛游傾動諸公卿陸太保炳掌錦衣引爲上客經歷沈鍊文章忠義士也兩人深相結納調護一時諫臣先後論執政下詔獄者人皆歸功于炳而不知奎與鍊陰爲之地也鍊將劾嚴嵩父子屬奎以後事奎許之已而下獄嵩父子力搆置之死奎傾身庇之得未減世蕃訶知之欲中以奇禍乃脫身歸里中與方九叔沈仕結社湖山之間年八十餘卒歸安茅坤表之曰詩人李珠山之墓

武林耆舊傳

沈朝宣字三吾仁和人以貢入京師故事貢生四月望廷
試聽翰林甲乙卽歸不得與直隸秋比朝宣負奇氣投書
吏禮二部又詣登聞院鳴鼓御史上其事遂捷于京闈貢
生得附京省試自朝宣始是年嘉靖辛卯也數上春官不
第教諭涿州其教人先德行次經術次治事循循有條善
談論援古今得失使聽者忘倦臺使交薦遷江陵令性友
愛以兄老無子請告歸闕荒圃築精舍與兄觴飲流連至
老彌篤暇日談邑事網羅舊典採輯新聞成私志若干卷
板燬于火今所傳抄本殘缺非其舊矣

仁和縣志

陳鳳書昌化人自號陽巖處士博攻羣籍爲諸生有聲尋

入南監與胡宗憲袁煒爲貧賤交後宗憲煒皆通顯禮遇至厚煒嘗語其所知出總試事者曰太學陳鳳書國士也勿失之鳳書聞之辭不赴煒益服其高行宗憲爲浙江總督數招之遊不往後將移鎮始一謁握手述少年鄉里事竟無一言及私嘗散千金資宗黨之婚葬旬貸者大起書

樓聚族衆子弟力學其中一日儵然而逝

昌化縣志

徐桂字茂吳餘杭人目偏盲而性警敏登隆慶辛未進士授袁州推官堅正不阿失上官指遂投劾歸居杭城東隅有亭池竹木之勝興至發爲詩歌競響漢魏六朝間尤長

咏物著詩文雜稿數十卷

兩浙名賢錄

高來本名奎字良玉仁和人宋太尉瓊之後爲文宗典謨
法韓孟學者翕然尊師之以選貢授邵武府訓導

舊志

沈守正字無回錢塘人萬歷癸卯舉于鄉謁選得黃巖教
諭遷國子監博士擢都察院司務守正高才博學詩文雋
爽喜爲蘇白體直指李公按浙時折柬咨詢守正益自發
舒所條上潯河積米防倭練戍諸議多采擇施行台卒課
海滙叅政張師繹單騎入台守正謁道左師繹曰劇孟在
吳楚無憂况得國士乎乃設方畧殲大憝解株連口不言
功中丞益重之浙西銓部缺鄉大夫欲推轂守正守正以
學博俸淺破調驟遷非國家愛惜名器意力辭僅得司務

卒錢塘縣志

聞啟祥字子將錢塘人博綜羣書尤工制舉業

錢塘縣志杭州

先有讀書社啟祥張天生馮延年暨餘杭三嚴後乃入于復社而登樓會繼之文必六朝詩必三唐啟祥好延納賓客若置驛然江廣閩越之士登賢書者到武林必質義于啟祥品題甲乙命梨棗曰行卷制義之有行卷自祥始萬歷壬子舉于南雍嘗與吳郡李流芳計偕入京已入國門忽趣車徑返後屢以薦徵辭不赴弟啟正子淡明亦有聲

靜志居詩話

鄭之惠字孔肩一名圭錢塘人父炳太倉侔子之瀚殤呼

天而號夢登高邱有帝者憑玉几授以圭出見殿壁榜書
敕十人抹之漸名易以之惠後生男遂名之既而曰神授
我圭更名圭少補錢塘弟子員穿穴典故精研經史遂爲
士林所推以貢士爲校官擢平樂令適平樂有軍譁之惠
單車宣朝廷意遂定轉州守告歸

錢塘縣志

何春畿字汝萃號念堂富陽人爲巡按王本固所知聲聞
籍甚後屢舉不第萬歷己亥以選貢廷對第一授江西臨
江通判陞雲南新化知州討平苗蠻有功春畿詩文清綺
婉麗多風十九年卒于官

富陽縣志

周羔字南甫一字贊卿富陽人督學喬因阜奇其文許爲

解元次日秀水陳懿典過訪曰學使者業以元期家弟今復許君若何因與定交榜發則陳一周二也已未授南直天長知縣以文學飾吏治當事重之陞山西延慶州知州

告歸卒年八十六崇祀鄉賢

富陽縣志

吳梯字仲升富陽人爲文章務自立堂與耻爲駢偶靡麗之習詩亦瞻雅多丰骨不作近體餘姚胡廷試氣豪邁見梯不覺自折仁和令劉洪謨聞而延致之會同遊湖山言及田汝成志西湖獨不及作賦梯請授楮筆據案疾書立

成三賦一坐傾倒

富陽縣志

李春耕餘杭人自號懷伊山人少好學補諸生薄舉業不

爲經史而外多購天文輿地兵書字學諸種博學靡窮意自得也性簡傲體貌昂藏衣履襲古製縉紳多禮重焉無

嗣卒門人墓于仇山

餘杭縣志

孫桂枝字林一餘杭人晚讀易至頤卦有得更號頤齋事後母至孝嫺睦宗族負資甚高博攻典籍下筆泉湧風發以歲貢授歸安訓導有蘇湖之風焉歸已年暮猶手不停披知縣請鄉飲辭不赴預知死時口脩然而逝子五人長奕美登萬歷癸卯鄉書事後母亦以孝著次光美揚美敬美章美並有才名諸孫繁昌咸謹禮義邑推德門者必曰

東南里孫

餘杭縣志

盛世麟字汝振於潛人穎悟夙成行文伸紙直書如江河
莫禦詩古文辭工瞻典麗名籍甚弱冠受知於學使蘇濬
萬歷癸卯闈中以首薦不獲置副榜已酉又以爭元置副

士咸惜之

於潛
縣志

沈大亨字正叔號樟亭錢塘人宋學士文通之後少爲諸
生博極羣書美尺牘百函可立待而不善舉場之文故艱
于遇合中歲遊京師入賞得楚府典寶正昭王雅志典璫
接遇賢士大夫盡禮大亨輔導之功居多

城東
雜記

虞淳熙字長孺錢塘人萬歷癸未進士授兵部職方主事
遷主客員外補稽勲郎以耿介見嫉削籍歸家貧無書與

弟淳貞搜奇獵秘閉門鈔寫方術陰符靡不通曉少歲受
知于王世貞賦才奇譎搜奇字僻句務不經人弋獲以爲

絕出于時賢頗心折湯顯祖及屠隆自詭以昇兀勝之

江浙

志通常以文字爲佛事碑板疏頌照耀東城長明蓮居二禪

窟貞石猶存子宗玫宗瑤閉戶下帷自相師友宗玫豐軀
偉貌初生時面如紅玉故名爲人朴訥罕事文飾而宗瑤
則英敏爽朗每發議輒解人頤與友交初甚落落久乃益
篤入復社有才名仁和馮倬社中知名士也貧而不遇無
子病危時屬家人巾車至二虞家爲之親治醫藥晝夜不
懈及卒中堂治喪屏庭設司鼓宗玫宗瑤跪拜謝弔客被

古友朋喪服交誼之篤如此

城東雜記

卓明卿字徵甫仁和人眉目如畫始薄章句與豪子弟學
騎射劍術已乃折節閉門博綜百氏所交傾海內豪傑好
稱詩初爲國子生賦桃溪書屋詩詩聲滿留都謁選得光

祿署正好詩彌篤父艱服闋補珍饈署正

兩浙名賢錄

丁奇遇字孟嘉錢塘人萬歷間古學寔衰業舉子者相戒
畜經史荒陋成習奇遇勵志復古與聞啟祥虞宗瑤宗玫
嚴調御武順敕創讀書社一月數會性孤異作文務爲奇
雋讀禮記疑其注未善單精晰義嘗至夜分心有感觸拍
案狂呼曰始得聖賢意其爲詩喜李供奉與長吉有集十

卷

錢塘
縣志

湯之奇字稗常錢塘人少穎悟四歲就外傳讀書目數行
下比一年卽能振筆作文語多奇峭不屑襲前人先生長
者驚異之萬歷戊午舉于鄉後官太平府同知兼署江防
事時流寇蹂躪梁豫間之奇設方略擒其渠魁餘悉解散
督上下江糧餉所過立辦兵食以濟尋陞江西瑞州知府
未至官丁母憂居家闔門謝客巡撫疏薦以疾堅辭築室
東園名曰蓬菴讀書灌町課子姓其中孫右曾別有傳

錢舊

塘縣
志

施莊字康夫錢塘人居紫陽山少貧力學性穎異爲諸生

試輒高等布政司吳某極重之延上坐莊衣大布衣着高齒屐踞客座高談今古燭跋不使去因謂人曰施生貧我周恤其家弗使知也設館鳳山之陽戶外屢恒滿武林號

爲施氏學

錢塘縣志

馮廷槐錢塘人少叅自南之兒子也博洽羣籍下筆英邁自成一家晚年自稱二西山人不復求進取著武林近事

十卷

舊志

姚懋繼字汝子餘杭人少穎達下筆千言以歲薦入成均謁選判廣漢府攝州事力持稅璫州人獲免于禍上平糴詩于當事擘畫悉中機宜尋移西安建馬政十議當道行

之久之致仕歸懋繼性孝友以易經授邑子弟皆文章髦
士歸擴祀田收族以孝弟勗鄉里手一編自適足不至城
市子星吾萬歷丙午鄉試第一謂皆懋繼貽教云

餘杭縣志

李能榮號心菴餘杭人醇謹好學自餽邑庠時同人已嚴
事之及訓導秀水誘掖士類遠近多興起遷龍泉教諭地
稍僻能榮曰此正司鐸者所當致力之地也聚諸生日講
藝有周光世者少而材偶爲法受累能榮力全之崇正丙
子光世登賢書無不歎其能得士

舊餘杭縣志

翁開之字叔明仁和人衛輝知府汝遇子汝遇勤敏所至
有政聲開之領甲子鄉薦性好潔惟鍵戶讀書不與州縣

事與錢塘丁允和友善允和字叔介丁卯舉人安貧自樂
衣敝屨穿恬如也時孝廉有事干謁者人目爲三丐而開
之允和世推重爲二君子云開之生二子喆菁喆中順治
乙未進士歷官龍安知府有惠政善詩詞俊逸以貢授德

清訓導卒于官

仁和縣志

王之獻字伯珍富陽人藏書甚富喜讀古史好詩賦頗厭
舉子業入南雍見以太學仕郡縣倅者類掣肘遂不就選

退而益著書

富陽縣志

吳杉字松侶自海寧徙錢塘杉少敏捷才氣奔放天啟丁
卯舉于鄉年止十八清癸玉立望傾流輩是歲族兄太冲

舉于應天太冲宿負盛名屢躋始達而杉以童年與之角
勝風流文采照耀江表三上春官不得意而卒杉家貧耻

干謁事繼母以孝聞

錢塘縣志

何萃字輶亦錢塘人少孤力學崇禎己卯以貢入南雍吳
太冲時爲司業嘗移書吏部曰萃武庫甲兵今朝廷急士
當及鋒用之會爲忌者所沮免歸設館鳳山之麓武林從

遊者曰何氏學

武林者舊集

潘之洪字爾瞻錢塘諸生捐去俗學志于述作于孝經小
學易春秋尚書詩禮各有注爲詩古文皆有法度弟之淙
字無聲自相師友家貧移書就寺燈讀之終夕不寐以詩

文名學者稱爲二潘先生涼子士韶亦有文名

錢塘縣志

吳本泰字梅里一字藥師海寧人崇正甲戌進士時年六十一矣深于經術凡官方兵制國計邊防屯田河渠一切利弊無不畢究莊烈平臺召見條對稱旨超擢吏部郎中累遷尚寶司丞詩文詞賦時人目爲淵海

海寧縣志

字美子仁

和人當正聲微茫之日獨探大雅之音而揚風扞雅者或

不及焉益信曲高者和寡也

明詩綜小傳

按省志選舉門本泰海寧人故海寧志列之朱彝尊以爲仁和人且其字亦與志異殆襲尊誤也魏嶸錢塘志

載入寓賢亦作海寧人

朱一是字近修海寧人崇正壬午舉人父履和乙卯舉人

以經術聞

舊浙江通志

近修文名早擅遠避地江東屈志百里

尤以才畧見長從遊弟子強之說經因文社太邱之交道日廣州來之縞紵彌多古今詩不事矜鍊而詞采斐然音

節清鏘是歷下四溟敵手

明詩綜小傳

高鏞字斗冲工書法敏悟絕倫于書史靡所不覽以貢授南海簿遷布政司經歷淡于仕進尋賦歸來放懷詩酒著

有菊花百詠

臨安縣志

卓人月字珂月貢生才情橫溢所撰續千文穩帖而奇肆

詩亦不爲格律所拘

仁和縣志

沈瑞徵字靈繹海寧諸生其詩高者近大歷十子下亦不
失爲四皇甫年未五十而歿

明詩綜
小傳